



Sud Bosne i Hercegovine
Суд Босне и Херцеговине

Broj: S1 3 P 037236 20 Iž
Sarajevo, 09.10.2020. godine

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Srete Crnjaka kao članova vijeća, odlučujući o žalbi Darka Stupara sa boravkom u Srbiji 21460 Vrbas, ul. Josifa Pančića bb (kod Vladimira Lukića,), koji osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasnje izvan BiH za Lokalne izbore 2020. godine, u nejavnoj sjednici, održanoj dana 09.10.2020. godine, donio je

R J E Š E N J E

Žalba se odbija.

O b r a z l o ž e n j e

Centralna izborna komisija Bosne i Hercegovine je Odlukom broj i datum navedeni u uvodu odbila upis u izvod iz Centralnog biračkog spiska za glasnja izvan BiH za Lokalne izbore 2020. godine po podnesenim prijavama do 01.09.2020.godine jer nisu ispunjeni uslovi propisani članom 3.15. stav 1, 2 i 3 Izbornog zakona BiH.

Navedenom odlukom odbijena je prijava Darka Stupara koji je blagovremeno izjavio žalbu u kojoj je naveo da se uredno prijavio da glasa van BiH na adresi u Vrbasu ul. Josifa Pančića bb te izjavljuje žalbu na odluku o skidanju sa spiska i moli da mu se omogući glasanje sa navedene adrese.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je žalitelj dostavio dvije prijave za glasanje izvan BiH u kojima su navedene različite adrese na koje treba da bude upućen glasački materijal. Druga prijava se ne može smatrati obavjesti o promjeni podataka u smislu člana 3.16 Izbornog zakona jer ne ukazuje na saznanja o podnesenoj prvoj prijavi i da predstavlja promjenu podataka iz prve prijave. Kako nije bilo moguće utvrditi koja od podnesenih prijava je vjerodostojna, te kako žalitelj ni uz žalbu nije dostavio dokaze da je adresa na kojoj traži da dostavu glasačkog materijala i adresa njegovog boravišta, zaključeno je da se radi o zloupotrebi biračkog prava.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluke Centralne izborne komisije BiH kojom je odbijena prijava žalitelja za upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Iz predmeta spisa utvrđeno je da je žalitelj dana 25.08.2020. godine na propisanom obrascu, putem maila, podnio prijavu za glasanje izvan BiH u kojoj je naveo da se glasački materijal uputi na njegovo ime, na adresu Republika Srbija 21000 Novi Sad ul.Šafarikova 10.

Nadalje, utvrđeno je da je dana 01.09.2020. godine, podnesena druga prijava žalitelja za glasanje izvan BiH u kojoj je navedeno da se glasački materijal ima dostaviti na adresu Lukić Vladimira u Srbiji, Vrbas, ul. Josifa Pančića bb.

Proizilazi da je žalitelj podnio dvije nezavisne prijave za glasanje izvan BiH i da je Centralna izborna komisija BiH pravilno zaključila da se druga prijava ne može smatrati promjenom podataka iz prve prijave o adresi na koju se ima dostaviti glasački materijal. Na takav zaključak ne upućuju ni navodi žalbe iz koje ne proizilazi saznanje žalioaca o podnesene dvije prijave.

Iz stanja spisa utvrđuje se da je žalitelj prijavio dvije adrese prebivališta u Srbiji, od kojih jednu adresu je potom ponovio i u žalbi. Žalitelj uz prijavu, a ni uz žalbu nije dostavio dokaze o prebivalištu na bilo kojoj od adresa koje je naveo. Kod nedostatka bilo kakvog dokaza koji potvrđuje da žalitelj ima prebivalište van BiH, Centralna izborna komisija BiH nije mogla utvrditi koja od podnesenih prijava je vjerodostojna. U ovim okolnostima nedostaju relevantni podaci na osnovu kojih se može ispitati ispunjavanje zakonskih uslova za ostvarivanje biračkog prava državljanina BiH, a za koje je, shodno članu 3.15 stav 7 Izbornog zakona BiH, odgovoran podnosilac prijave. Predmetnom odlukom žalitelju nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izornoj jedinici u kojoj ima prebivalište u Bosni i Hercegovini.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
Dinka Bešlagić Čovrk